


## ALAHADY PAKA - TAONA B



« *Dia mba lasa koa i Piera sy ilay mpianatra anankiray nankany amin'ny fasana, ka niara-nihazakazaka izy roa lahy* » (Jo. 20: 3 - 4)

Ry Kristianina havana, an-kafaliana sy an-karavoana no anolorako fiarahabana sy firarian-tsoa omban-tsodrano ho antsika Olo Araiky , “Fratelli Tutti” amin’izao Paka 2021 izao. Tsy mihambahamba aho fa tena Paka manokana sy miavaka ity Paka satria iarahantsika mianakavy midera sy manome voninahitra an’Andriamanitra noho ny fankalazana an’i Kristy tafatsangan-ko velona fa indrindra hanambarantsika amin’ny feo manakoako ny fandresen’ny ratsy ary matoky isika fa anisan’ny ratsy ho resy ity KORONTANAVIRUS ITY. Paka fandalovana araka ny naverimberintsika matetika nandritra ny karemy fiomanantsika amin’ny Paka. “Ady sy Dia” “Ady” amin’ny ratsy dia ny fahotana manapotika ny fiainantsika ary ity areti-mandoza niteraka korontana maro amin’ny fiainantsika ity dia anisan’ireo ratsy nirintsika ho potika tokoa ary “Dia” mankany amin’ny fiainana miaraka amin’i Kristy ka hanaovantsika “départ vaovao”, “Fiaingana vaovao”. Tonga tokoa ity ny fotoana, nandresy tamin’ny ady i Kristy, niara-maty taminy isika amin’ny fahotana ka matoky fa miara-

mitsangana Aminy koa amin’ny fandresena ny ratsy, miditra amin’ny fiainam-baovao. Fotoam-pahasoavana lehibe tokoa izao Paka izao satria tena ivon’ny maha-EOV MISIONERA TABERNAKLA VELONA antsika, hahatonga antsika ho “Generation de bâtisseurs”, Taranaka Mpanorina miaraka amin’i

Vakiteny I : Asa. 10, 34a.37-43

Tononkira : Salamo 117

Vakiteny II : 1 KOR 5,6b-8

Evanjely : Jo. 20, 1-9

Kristy Mpampihavana. Manorina ny fifandraisana vaovao eo anivon’ny tontolo iainana araka ny annexe II. Manomboka amin’izao Paka izao miaraka amin’i Kristy Fihavanana ka zary Olo Araiky isika ka mametraka fifandraisana mitondra amin’ny fifampitsimbina sy fifanasoavana satria araka ny fampianarana naverina dia nentin’ny Fanahy Masina ka niroso amin’ny

fiovam-penitra mahery vaika ara-pitondran-tena vokatry ny safidy namafisana tamin'ny fanavaozana ny toky tamin'ny Batemy. Olom-baovao isika ka mitoetra ao amin'i Kristy sy itoerany ka hamokatra be ary feno hafaliana satria ao anatin'ny fiadanana. Tsy ilay fiadanana omen'izao tontolo izao izay mitondra amin'ny fahadisoam-panantenana fa ny fiadanana'i Kristy nandresy. Io fiadanana io no hifampizarantsika amin'izao fankalazana manetriketrika ny Paka izao. Vaovao mahafaly hifampizarantsika velona marina tokoa i Kristy. Nandresy ny faran-tampon'ny ratsy rehetra Izy dia ny fahafatesana. Nandresy niaraka Aminy isika ka mitondra antsika tanteraka amin'ny fiainana vaovao. Izany ny Aleloia hiraina sy ankalazaintsika. Ny Aleloia dia midika fanomezam-boninahitra ary fiderana an'Andriamanitra, manambara hafaliana sy haravoana. Raha misy faniriana lalina amin'izao Paka izao ary ka hifampizarantsika ilay hafaliana lavorary ao amin'i Kristy dia aoka ho feno Aleloia ny fiainantsika manontolo, hanambara ny Aleloia eo amin'ny manodidina antsika.

Izany ny Paka ho antsika. Paka hitondra fiadanana ho antsika. Ary Paka manokana ho antsika araky ny voalaza teo satria miatrika izao areti-mandoza sy voka-dratsiny maro lafy ka manakorontana ny fiainana. Izany no mahatonga antsika hanao départ vaovao fa tsy départ zéro araky ny sangisangy ataon'olona. Na Andriamanitra aza tsy nanao départ 0 raha namonjy antsika fa naniraka ny Zanany ho tonga olombelona, nanolotra ny ainy, nandatsaka ny rany teo amin'ny hazofijaliana, nitsangan-ko velona namerina amin'ny laoniny ny zava-drehetra na dia miasa mafy aza ny demony. Hitantsika izany amin'ity KORONTANAVIRUS lity. Matoky anefa isika fa nandresy ka miroso ny diantsika amin'ny fiainam-baovao miaraka Aminy sy amin'ny alalany ary ao Aminy.

Misy evanjely telo atolotry ny Eglizy vakiana androany, iray amin'ny maraina, iray amin'ny antoandro, ary iray amin'ny hariva. Ka ny Evanjelin'i Md Joany no entiko hifampizarana amintsika sy hiarahantsika hidera an'Andriamanitra amin'izao fankalazana ny Paka izao. Mitantara ny zava-mitranga tamin'ny voalohan'ny herinandro dia ny Alahady izay andro lehibe fankalazana ho antsika. Tsy hoe resy ny Sabata sanatria io vao nolazaintsika teo. Tsy départ 0 fa "nouveau départ" izany hoe ny Paka ho antsika fankalazana an'i Kristy andresy ananavao ny zava-drehetra dia fanorenana vaovao, fahariana vaovao, manambara fidirana amin'ny fiainam-baovao. Tsy hoe ratsy ny fahariana sy ny fanorenana taloha fa noho ny fahotana dia lavo isika ka resy tamin'ny fakam-panahy.

I Kristy no niady ka nandresy ary tanteraka ny fitsanganan-ko velona, izany no mahatonga antsika mankalaza ny Alahady satria manambara fiainam-baovao. Nandeha tany am-pasana i Maria Madelena. Manambara haizina sy fahafatesana ny fasana, izany hoe ny fahotana mamono ny fiainantsika. Tsy nahita ny fatin'i Jesoa izy ka lasa niantso an'i Piera sy Joany izay lasa koa namonjy ny fasana. Izany dia tandindon'ny fiainantsika anatin'ny fijaliana sy fahariana, fasana manambara ny faharatsiana sy fahafatesana. Milaza miara-mahita isika miatrika izao areti-mandoza izao. Mihoron-koditra isika mahita ireo fianakaviana tsy afaka mandevina. Mavozo isika tsy afaka mifamangy intsony satria mavozo sao tratry ny aretina. Tsy azontsika andosirana ny fiainana tsizarizary fa avy amin'io no mitondra amin'ny fiainana

vaovao satria mandresy i Kristy. Nanaiky hilevina I Kristy fa tsy nanaiky ho lò tao ampasana mba hanambara amin'ny entanin'ny finoana fa ny ratsy no nalevina toa ary ny ratsy faratampony dia ny fahafatesana no nalevina toa ka ny fiainam-baovao no atolony ho an'izay mandray azy izany hoe mandray ny Batemy.

Nandeha tany izy ireo ka nahita ary nino. Aoka ho fampianarana ho antsika izany, marina fa tsy nahita amin'ny mason'izao tontolo izao izy ireo satria raha izany dia tsy hahita na oviana na oviana ny fahasoavan'ny fitsanganan-ko velona izany fa amin'ny masom-pinoana no hijerentsika azy tahaka ny nataon'i Md Piera sy Joany. Aoka àry ho entanin'ny fahasoavan'Andriamanitra isika ka hirehidrehitra ny fontsika tahaka an'ireo mpianatra nankany Emaosy raha teny an-dàlana izy ireo ka nivaofy ny Soratra masina taminy i Jesoa. Nisokatra ny mason'izy ireo tamin'ny masom-pinoana ka nahita an'i Kristy. Matetika isika no tsy mahita an'i Kristy amin'ny fiainantsika satria mijery araky ny mason'izao tontolo izao sy mihaino araky ny sofin'izao tontolo izao nefa i Kristy tsy mitsahatra mampianatra antsika ary tsy mitsahatra mampianatra antsika koa ny Eglizy.

Ry kristianina havana, izany no firarian-tsoa sy vavaka iarahantsika manao amin'izao Paka manokana izao, Paka iatrehantsika an'ity areti-mandoza mandripaka ny fiainantsika ity. Navozo, kivy ireo Mpianatra nefa nosokafan'Andriamanitra ny masonry sy ny fony ka nahita izy ireo ka nino. Enga anie hahiratra koa ny masom-pinoantsika, hisokatra ny sofin-pinoantsika, hisokatra ihany koa ny fontsika ka hivaha vavam-pinoantsika hanambara fa i Kristy dia nandresy ary izy no famonjena ho antsika. Zary EOVI MISIONERA TABERNAKLA VELONA ISIKA. Mila izany izao tontolo izay very fanahy amin'izao

Mivonona àry isika EOVI MISIONERA hanao tahaka ireo apôstôly ao amin'ny vakiteny voalohany boky mitantara ny asan'ny Apostoly. Entanin'ny Fanahy Masina izy ireo ka sahy nanambara fa efa nitsangan-ko velona tokoa i Kristy. Enga anie isika ho tahaka azy ireo hijoro ho vavolombelona hanambara ny fandresen'i Kristy ny ratsy amin'ny alalan'ny fiainantsika. Fa izany no tadiavan'izao tontolo izao "vavolombelona fa tsy toriteny na resaka ambony vavahady". Mihaino Mpitoriteny ny olona satria vavolombelon'ilay mpitory izany hoe tsy manao kobaka ambava fa hita amin'ny fiainana izay lazainy. Izany no nataon'i Lucien Botvasoa. Nataon'i Victoire Rasoamanarivo. Nataon'ireo Olomasina sy Olontsambatra Malagasy. Mila vavolombelona izao androntsika izao, vavolombelona mitondra fanantenana satria maro ny zavatra mandiso fanantenana antsika, mila vavolombelona manambara hafaliana tena marina amin'izao andro iainantsika izao. Izany no hita taratra tamin'i Lucien Botvasoa, tamin'ireo Olontsambatra sy Olomasina malagasy izany hafaliana avy ao anaty fa tsy hafaliana fihatsarambelatsihy, hafaliana mitondra fiadanana nentin'i Kristy ka isaky ny miseho amin'ny mpiara-belona I Kristy amin'izao vanim-potoanan'ny Paka izao dia milaza hoe "Homba anareo anie ny fiadanana." Io ny fifampiarahaban'ny Kristianina hanambara fa na dia eo azo ny zavamisy vokatry ny korontana, asan'ny demony dia matoky isika fa raha miaraka amin'i Kristy Nandresy dia afaka mizara fiadanana.

Enga anie ho maro isika ny ho vavolombelona mizara ny fiadanana, hizara ny fahamarinana, hizara ny fifankatiavana satria izany no mitondra amin'ny fihavanana marina.

Ny vakiteny faharoa mitantara ny fanorenana ny Eokaristia, ka i Kristy no mofo tsy misy lalivay izany hoe manambara ny fandalovana, niala tamin'ny fanandevozana tany Ejipta ka miditra amin'ny tany nampanantenaina. Izany no Paka ho antsika miala amin'ny fiainana tsizarizary mirefarefa amin'ny tany dia mandray ny mofo tsy misy lalivay izany hoe tsy misy faharatsiana intsony fa mofo vaovao ary tsy mety simba mandrakizay dia tsy iza fa I Kristy.

*“Tsy fantatrareo angaha fa lalivay kely foana dia mampibonaka ny vongan-dafarîna manontolo? Esory re ny lalivay ela, mba ho vongana vaovao ianareo, sady efa voavono i Kristy izay Paka ho antsika koa aoka àry isika hankalaza ny fety tsy amin'ny lalivay ela, na amin'ny lalivaim-paharatsiana aman-dolom-po, fa amin'ny mofo tsy misy lalivay, dia ny fahadiovam-po amam-pahamarinana izany....”*

Izany no vokatra antenaintsika amin'izao Paka izao sy angatahintsika ny fahasoavan'Andriamanitra mba ho fo vaovao ary ao anatin'ny fahamarinana no ankalazantsika an'izao Paka izao. Nandresy ny ratsy tokoa i Kristy, nandresy ny fahotana, nandresy ny fahafatesana, ireo no lalivay taloha, lalivain'ny faharatsiana, fialonana, avonavona, fitiavan-tena, ho resentsika sy ho levona ao amin'ny fasana ireny rehetra ireny ka hiara-hitsangana amin'i Kristy isika ho EOVI MISIONERA TABERNAKLA VELONA ka ho feno ny ntlalivain'ny fanompoana, ho feno ny lalivain'ny fikatrohana, ho feno ny lalivain'ny fitiavam-bavaka, ho feno ny lalivain'ny fahafoizana sy fanompoana, ho feno ny lalivain'ny fandraisana antana ary lalivain'ny fandalinam-pinoana ka tena ho départ vaovao tokoa. Izany no entintsika mamakivaky an'izao Paka izao, ka ho tena “génération devbâtisseurs” isika, ho taranaka mpanorina ka ho EOVI mandray an-tànana amin'ny alalan'ny fitiavam-bavaka, fandalinam-pinoana sy ny firotsahana amin'ny fikambanana masina ary Eglizy Olona Velona tokoa isika amin'ny alalan'ny fifanompoana fa indrindra ireo madinika eo amintsika, hampanjaka ny rariny sy ny hitsiny, hampanjaka ny fifankatiavana amin'ny fitiava-namana marina, ny firotsahana amin'ny vaomiera masina hanompoantsika ny Eglizy Olona Velona izany. Handray an-tànana ara-panahy, ara-tsaina, ara-nofo tokoa ny eglizintsika. Ho vonona hahafoy ny fiainantsika manontolo tahaka an'i Lucien Botvasoa sy ho vavolombelona, ary hanana faharetana hatramin'ny farany amin'ny fijoroantsika ho vavolombelona isika, hanana fitiavam-bavaka tahaka an'i Lucien Botvasoa, ho vonona mandrakariva hivelona ny finoantsika.

Miarahaba sy mirary soa ho antsika rehetra ary mandrotsaka ny tsodranon'Andriamanitra amin'izao Paka izao, ho Paka tokoa ny fiainantsika ka feno Aleloia. Ho “départ vaovao” amin'ny fifampitsimbina sy **fifanasoavana** vokatry ny fahasoavana no raisintsika ka ho OLO ARAIKY TOKOA ISIKA JIABY HO FRATELLI TUTTI. Mitoera àry ao amin'i Kristy ary izy hitoetra ao amintsika dia hamokatra be ny fiainantsika. Homba antsika mianakavy anie ny Tompo, ho tanteraka tokoa izany ary hitso-drano sy hitsimbina antsika anie Andriamanitra mahefa ny zavatra rehetra Ray, Zanaka sy Fanahy masina. Amen

Mompera Arseveka Mgr Benjamin Ramaroson